

# CURRENTA

Episcopalis Consistorii Premisliensis r. l.  
Annus 1869.

Nr. VII.

Ad universum Venerabilem Clerum Dioecesanum.

Nr. 21

Ord.

Litteris Circularibus dd. 11. Maji a. c. N. 1015. significavimus Vobis, occasione convocati in diem 8. Decembris a. c. oecumenici Concilii concessas esse a SSmo Dno nostro Pio P. IX. Indulgentias plenarias ad instar Jubilaei, lucrandas Romae a die 1. Junii a. c. alibi vero a die per Loci ordinarios statuenda, usque ad diem, quo oecumenica Synodus fuerit absoluta. Insimul vero secundum Mandatum Summi Pontificis ordinavimus, ut inde a 1. Junii a. c. qualibet in Missa ab omnibus Sacerdotibus sumatur oratio de Spiritu s., praeterea vero ut in Ecclesia Cathedrali et in omnibus Ecclesiis Regularium, in quibus Missa Conventualis habetur, omni feria V. sacrificium de Spiritu sancto celebretur.

Modo jam communicamus Vobiscum Ipsas Litteras Apostolicas dd. 11. Aprilis a. c. quibus praedictae Indulgentiae Jubilaei indicuntur; quarum tenor est sequens:

OMNIBVS CHRISTIFIDELIBVS PRAESENTES LITTERAS INSPECTVRIS

PIVS PP. IX.

SALVTEM ET APOSTOLICAM BENEDICTIONEM.

Nemo certe ignorat, Oecumenicum Concilium a Nobis fuisse indictum in Basilica Nostra Vaticana die 8. futuri mensis Decembris Immaculatae, Sanctissimaeque Deiparae Virginis Mariae Conceptioni sacro inchoandum. Itaque hoc potissimum tempore nunquam

32.

Transmittuntur V. Clero Dioecetano litterae pastorales occasione concessarum a SS. Dno. PP. Pio IX. Indulgentiarum ad instar Jubilaei.



desistimus in humilitate cordis Nostri ferventissimis precibus orare et obsecrare clementissimum luminum et misericordiarum Patrem, a quo omne datum optimum, et omne donum perfectum descendit (1), ut mittat de caelis sedium suarum assistricem sapientiam, quae Nobiscum sit, et Nobiscum laboret, et sciamus quid acceptum sit apud eum (2). Et quo facilius Deus Nostri annuat votis, et inclinet aures suas ad preces Nostras, omnium Christifidelium religionem, ac pietatem excitare decrevimus, ut conjunctis Nobiscum precibus, Omnipotentis dexteræ auxilium, caeleste lumen imploremus, quo in hoc Concilio ea omnia statuere valeamus, quae ad communem totius populi christiani salutem, utilitatemque, ac majorem catholicae Ecclesiae gloriam et felicitatem, ac pacem maxime pertinent. Et quoniam compertum est, gratiores Deo esse hominum preces si mundo corde, hoc est animis ab omni scelere integris ad ipsum accedant, iccirco hac occasione caelestes Indulgentiarum thesauros dispensationi Nostrae commissos Apostolica liberalitate Christifidelibus reserare constituimus, ut inde ad veram poenitentiam incensi, et per Poenitentiae Sacramentum a peccatorum maculis expiati, ad Thronum Dei fidentius accedant, ejusque misericordiam consequantur, et gratiam in auxilio opportuno.

Hoc Nos consilio Indulgentiam ad instar Jubilaei Catholico Orbi denunciamus. Quamobrem de Omnipotentis Dei misericordia, ac Beatorum Petri et Pauli Apostolorum ejus auctoritate confisi ex illa ligandi, ac solvendi potestate, quam Nobis Dominus licet indignis contulit, universis ac singulis utriusque sexus Christifidelibus in alma Urbe Nostra degentibus, vel ad eam advenientibus, qui a die primo futuri mensis Junii usque ad diem, quo Oecumenica Synodus a Nobis indicta fuerit absoluta, S. Joannis in Laterano, Principis Apostolorum, et Sanctae Mariae Majoris Basilicas, vel earum aliquam bis visitaverint, ibique per aliquod temporis spatium pro omnium misere errantium conversione, pro sanctissimae fidei propagatione, et pro catholicae Ecclesiae pace, tranquillitate, ac triumpho devote oraverint, et praeter consueta quatuor anni tempora tribus diebus, etiam non continuis, nempe quarta et sexta feria, et Sabbato jejunaverint, et intra commemoratum temporis spatium peccata sua confessi Sanctissimum Eucharistiae Sacramentum reverenter susceperint, et pauperibus aliquam eleemosynam, prout unicuique devotio suggeret, erogaverint, ceteris vero extra Urbem praedictam ubicumque degentibus, qui Ecclesias ab Ordinariis locorum, vel eorum vicariis, seu Officialibus, aut de illorum mandato, et ipsis deficientibus, per eos, qui ibi curam animarum exercent, postquam ad illorum notitiam hae Nostrae Litterae pervenerint, designandas, vel earum aliquam praefiniti temporis spatio bis visitaverint, aliaque recensita opera devote peregerint, plenissimam omnium peccatorum suorum, remissionem et Indulgentiam, sicut in anno Jubilaei visitantibus certas Ecclesias intra, et extra Urbem praedictam concedi consuevit, tenore praesentium misericorditer in Domino concedimus atque indulgemus, quae Indulgentia animabus etiam, quae Deo in caritate conjunctae ex hac vita migraverint, per modum suffragii applicari poterit.

(1) S. Jac. c. 1. v. 17.

(2). Sapient. cap. 9. v. 4. 10.



Concedimus etiam, ut navigantes, atque iter agentes quum primum ad sua se domicilia receperint, operibus suprascriptis peractis, et bis visitata Ecclesia Cathedrali, vel Majori, vel propria Parochiali loci ipsorum domicilii eandem Indulgentiam consequi possint, et valeant. Regularibus vero personis utriusque sexus etiam in claustris perpetuo degentibus, nec non aliis quibuscumque tam laicis, quam saecularibus, vel regularibus, itemque in carcere, aut captivitate existentibus, vel aliqua corporis infirmitate, seu alio quocumque impedimento detentis, qui memorata opera, vel eorum aliqua praestare nequiverint, ut illa Confessarius ex actu approbatus a locorum Ordinariis in alia pietatis opera commutare, vel in aliud proximum tempus prorogare possit, eaque injungere, quae ipsi poenitentes efficere possint cum facultate etiam dispensandi super Communionem cum pueris, qui nondum ad primam Communionem admissi fuerint, pariter concedimus atque indulgemus.

Insuper omnibus et singulis Christifidelibus Saecularibus et Regularibus cujusvis Ordinis et Instituti, etiam specialiter nominandi, licentiam concedimus, et facultatem, ut sibi ad hunc effectum eligere possint quemcumque Presbyterum Confessarium tam Saecularem, quam Regularem ex actu approbatus a locorum Ordinariis (qua facultate uti possint, etiam Moniales, Novitiae, aliaeque mulieres intra claustra degentes, dummodo Confessarius approbatus sit pro Monialibus), qui eos ab excommunicationis, suspensionis, aliisque ecclesiasticis sententiis, et censuris a jure vel ab homine quavis de causa latis vel inflictis praeter infra exceptas, necnon ab omnibus peccatis, excessibus, criminibus et delictis quantumvis gravibus et enormibus, etiam locorum Ordinariis, sive Nobis, et Sedi Apostolicae speciali licet forma reservatis, et quorum absolutio alias quantumvis ampla non intelligeretur concessa, in foro conscientiae, et hac vice tantum absolvere, et liberare valeant; et insuper vota quaecumque etiam jurata, et Sedi Apostolicae reservata (castitatis, religionis, et obligationis, quae a tertio acceptata fuerit, seu in quibus agatur de praejudicio tertii semper exceptis, quatenus ea vota sint perfecta et absoluta, nec non poenalibus, quae preservativa a peccatis nuncupantur, nisi commutatio futura judicetur ejusmodi, ut non minus a peccato committendo refraenet, quam prior voti materia) in alia pia et salutaria opera dispensando commutare, injuncta tamen eis, et eorum cuilibet in supradictis omnibus poenitentia salutari, aliisque ejusdem Confessarii arbitrio injungendis.

Concedimus insuper facultatem dispensandi super irregularitate ex violatione Censurarum contracta, quatenus ad forum externum non sit deducta, vel de facili deducenda. Non intendimus autem per praesentes super alia quavis irregularitate sive ex delicto, ex defectu, vel publica, vel occulta, aut nota, aliaeque incapacitate, aut inhabilitate quoquomodo contracta dispensare, vel aliquam facultatem tribuere super praemissis dispensandi, seu habilitandi, et in pristinum statum restituendi, etiam in foro conscientiae, neque etiam derogare Constitutioni cum appositis declarationibus editae a. fel. rec. Benedicto XIV. Praedecessore Nostro „*Sacramentum Poenitentiae*” quoad inhabilitatem absolvendi complicem, et quoad obligationem denunciationis, neque easdem praesentes iis, qui a Nobis



et ab Apostolica Sede, vel aliquo Praelato, seu Judice Ecclesiastico nominatim excommunicati, suspensi, interdicti, seu alias in sententias, et censuras incidisse declarati, vel publice denunciati fuerint, nisi intra tempus praefinitum satisfecerint, aut cum partibus concordaverint nullomodo suffragari posse aut debere. Quod si intra praefinitum terminum iudicio Confessarii satisfacere non potuerint, absolvi posse concedimus in foro conscientiae ad effectum dumtaxat assequendi Indulgentias Jubilaei, injuncta obligatione satisfaciendi statim ac poterunt.

Quapropter in virtute sanctae obedientiae tenore praesentium districte praecipimus, atque mandamus omnibus, et quibuscumque Ordinariis locorum ubicumque existentibus, eorumque Vicariis et Officialibus, vel ipsis deficientibus, illis, qui curam animarum exercent, ut cum praesentium Litterarum transumpta, aut exempla etiam impressa acceperint, illa, ubi primum pro temporum ac locorum ratione satius in Domino censuerint per suas Ecclesias ac Dioeceses, Provincias, Civitates, Oppida, Terras, et loca publicent, vel publicari faciant, populisque etiam Verbi Dei praedicatione, quoad fieri possit, rite praeparatis, Ecclesiam, seu Ecclesias visitandas pro praesenti Jubilaeo designent.

Non obstantibus Constitutionibus, et Ordinationibus Apostolicis, praesertim quibus facultas absolvendi in certis tunc expressis casibus ita Romano Pontifici pro tempore existenti reservatur, ut nec etiam similes, vel dissimiles Indulgentiarum, et facultatum huiusmodi concessionem, nisi de illis expressa mentio, aut specialis derogatio fiat, cuiquam suffragari possint, nec non regula de non concedendis Indulgentiis ad instar, ac quorumcumque Ordinum, et Congregationum, sive Institutorum etiam juramento, confirmatione Apostolica, vel quavis firmitate alia roboratis, statutis et consuetudinibus, privilegiis quoque indultis, et Litteris Apostolicis eisdem Ordinibus, Congregationibus, et Institutis, illorumque personis quomodolibet concessis, approbatis, et innovatis, quibus omnibus et singulis etiamsi de illis, eorumque totis tenoribus, specialis, specifica, expressa et individua, non autem per clausulas generales idem importantes, mentio, seu alia quaevis expressio habenda, aut alia aliqua exquisita forma ad hoc servanda foret, illorum tenores praesentibus pro sufficienter expressis, ac formam in iis traditam pro servata habentes, hac vice specialiter, nominatim, et expresse ad effectum praemissorum, derogamus, ceterisque contrariis quibuscumque.

Praecipimus autem, a commemorato die primo Junii usque ad diem, quo Oecumenica Synodus finem habuerit, ab omnibus universi catholici Orbis utriusque Cleri Sacerdotibus quotidie addi in Missa orationem de Spiritu Sancto, deque eodem Sancto Spiritu divinum, praeter consuetam Missam Conventualem, Sacrificium fieri in omnibus hujus Urbis Patriarchalibus, aliisque Basilicis, et Collegialibus Ecclesiis, nec non in cunctis totius orbis Cathedralibus et Collegiatis Ecclesiis ab earum Canonicis, atque etiam in singulis cujusque Religiosae Familiae Ecclesiis Regularium, qui Conventualem Missam celebrare tenentur, feria quaque quinta, qua festum duplex primae et secundae classis non agatur, quin tamen haec de Spiritu Sancto Missa ullam habeat applicationis obligationem.



Ut autem praesentes Nostrae, quae ad singula loca deferri non possunt, ad omnium notitiam facilius deveniant, volumus, ut praesentium transumptis, vel exemplis etiam impressis manu alicujus Notarii publici subscriptis, et sigillo personae in dignitate ecclesiastica constitutae munitis, ubicumque locorum, et gentium eadem prorsus fides habeatur, quae haberetur ipsis praesentibus, si forent exhibitae vel ostensae.

Datum Romae apud Sanctum Petrum sub Annulo Piscatoris die 11. Aprilis Anno 1869.

Pontificatus Nostri Anno Vicesimotertio.

**N. Card. Paracciani Clarelli.**

Adjungimus porro Litteras Nostras pastorales idiomate polonico ad populum fidelem Dioceseos Nostrae sub hodierno editas, quibus Indulgentiae Jubilaei publicantur, initium Jubilaei in tota Nostra Dioecesi in diem 15. Augusti a. c. praefigitur, et conditiones lucrandarum Indulgentiarum explicantur.

E tenore Litterarum Apostolicarum aequae ac Nostrarum Litterarum Pastoralium intelligetis, quatenus sint conditiones ad lucrificandam plenariam Indulgentiam a SSmo Dno Nstro praescriptae, et quantum Vobis incumbat officium, populum fidelem ad eam lucrandam rite praeparandi; item cognoscetis, quam ampla Vobis concessa sit potestas in fidelium reconciliatione.

Hic sequentia tantum adjungimus:

### **I. Quoad designandas Ecclesias, ad lucrandam Jubilaei Indulgentiam visitandas.**

In urbibus, ubi plures adsunt Ecclesiae, Curatus praeter Ecclesiam parochialem, alteram Ecclesiam catholicam lucrando Jubilaeo visitandum designabit et populo indicabit. Ubi praeter Ecclesiam latinam adest Ecclesia ritus rutheno-catholici, Curatus latinus cum rutheno Curato amice conveniet, suamque Ecclesiam pro fidelibus rutheno-catholicis qua stationalem offerendo reciprocam ab illo humanitatem pro fidelibus sui ritus expetat. In locis vero, ubi praeter parochialem nulla adest Ecclesia, bina visitatio Ecclesiae parochialis sufficit.

### **II. Quoad concessam Confessariis approbatis potestatem absolvendi ab omnibus peccatis et censuris ecclesiasticis, atque vota dispensando commutandi.**

1. Cum praedictae facultates ad Jubilaei consecutionem sint directae, hinc exerceri tantum possunt circa eos poenitentes, qui cum intentione lucrandi Indulgentias sacramentalem Confessionem faciunt. (Benedictus PP. XIV. in Litt. Apost. „Inter praeteritos” §. 62.) Et qui semel horum favorum particeps factus est prima vice, qua Jubilaeum consecutus fuit, iterum eorum particeps fieri non potest, si post primam Jubilaei acquisitionem iterum in censuras incurrerit, aut casus reservatos commiserit, vel novae votorum commutationis indigeat. (l. c. §. 85.)



2. Praedictis facultatibus uti licet tantum in actu sacramentalis confessionis. (l. c. §. 63.)

3. Vota licet *dispensando commutare*, quare potest quidem locum habere moderata quaedam inaequalitas inter votum commutandum et subrogata eidem pia opera; ast inaequalitas haec non debet esse nimia et exorbitans, quum principale sit commutatio, dispensatio vero nonnisi accessorium. (l. c. §. 45.)

4. Facultas dispensandi ab irregularitate restringitur unice ad irregularitatem ex violatione censurarum contractam, et quidem solummodo, si est occulta.

5. A quibus vero peccatis, et censuris absolvere, et quae vota commutare Confessarius etiam tempore Jubilaei non valeat, in Litteris Apostolicis clare expressum habetur. Hic loci id unice observamus: ad vota poenalia, seu praeservativa a peccatis, quorum commutatio Confessario intenditur, nisi commutatio futura sit ejusmodi, ut non minus a peccato committendo refroenet, quam prior voti materia, pertinere quoque vota totalis abstinentiae a cremato vel moderati ejusdem usus ad exiguam quantitatem determinati; et quum commutatio horum votorum in alia, quae aequae ac illa a peccato ebrietatis praeservent, vix ac ne vix quidem sine salutis periculo fieri poterit: ideo non licebit confessariis vota abstinentiae a cremato relaxare sive dispensando commutare, ne forte ansa prebeatur peccandi liberius.

## II. Quoad devotionis ordinem, et convenientem populi fidelis institutionem.

1. Dominica Festum Assumptionis B. M. V. antecedente, i. c. Dominica 12a post Pentecosten et 2a Augusti parochiarum Rectores populo fidei ad devotionem parochialem congregato Jubilaeum die 15. Augusti in festo Assumptionis B. M. V. inchoandum annuntiabunt, et Litteras Nostras pastorales eidem perlegent.

Pridie inchoandi Jubilaei post solis occasum omnes Ecclesiae campanae per unum horae quadrantem pulsabuntur. In ipso vero Assumptionis B. M. V. festo, quo Jubilaeum incipit, dato signo omnibus campanis pro Missa parochiali, Rector Ecclesiae Sanctissimo in ostensorio exposito, in infimo gradu altari genuflectens hymnum „Veni Creator” intonabit, eoque decantato versiculos et orationem de Spiritu s. dicet. Dein cantabitur Missa solemnis de festo. Inter Missam dicetur concio conveniens.

Finita Missa Celebrans praescriptis precibus pro Papa et pro oppressis Catholicis in Polonia praemittet Antiphonam, versiculos et orationem de Spiritu s., ut infra ponuntur. Postea decantabit hymnum „Przed oczy Twoje” et consuetas supplicationes. Processione cum Sanctissimo Sacramento intra vel extra Ecclesiam devotio concludetur.

2. Oratio de Spiritu s. sicut in qualibet Missa sumenda est, ita etiam in qualibet devotione parochiali ante preces pro Papa et pro Catholicis Poloniae cum populo dicenda erit.

3. Conciones habeantur devotioni Jubilaei congruentes. Primis tribus Dominicis post festum Assumptionis B. M. V. sermo instituat de eo: quid sint Indulgentiae? et

speciatim Indulgentiae Jubilaei vel ad instar Jubilaei? porro: Ecclesiam habere potestatem concedendi Indulgentias, easque fidelibus valde esse salutare, animabus quoque in purgatoris patientibus per modum suffragii adplicari posse. Conditiones item ad lucrandas praesentes Jubilaei Indulgentias praescriptae diligenter explanentur. Ceterum tum in concionibus quam catechesibus doctrina de Sacramento poenitentiae ejusque conditionibus accurate exponatur. Non praetermittenda quoque erit expositio doctrinae de infallibilitate Magisterii in Ecclesia Christi sive in Concilio congregati, sive per orbem dispersi; hujusque infallibilitatis necessitate.

4. Oneramus etiam conscientiam Catechetarum circa c. r. Gymnasia et Scholas Nationales, ut commissam sibi juventutem, item Capellanorum penes publicos carceres, ut spirituali curae suae concreditos debite ad indulgentias praeparent, et ratione operum eisdem injungendorum juxta praescriptum Litterarum Apostolicarum procedant.

Agite igitur, Fratres Dilectissimi! ut vos qua fideles ministros Christi et dispensatores mysteriorum Dei exhibeatis. Larga vobis aperitur messis; non recusate laborem. Insudate in docendo et excipiendis fidelium confessionibus, atque clavium potestate in spiritu Ecclesiae ad poenitentium salutem utamini. Esurientibus frangite panem, vulnera conscientiae sanate, infirmitatibus compatiamini, peccatoribus jannam misericordiae aperite. Labori vero jungite orationem, ut et labor vester fiat fructuosus, et vos Ipsi sanctificemini, atque pietatis ac laboris mercedem reportetis.

Modłmy się o pomoc i światło z Niebios dla Ojców św. Soboru.

#### Antyfona.

Przybądź Duchu święty, racz napelnić serca Twoich wiernych, i Twojej Miłości ogień w nich racz zapalić, któryś przez rozmaitość języków wszystkie narody w jedność wiary zgromadził.

V. Wypuść Ducha Twego, a będą stworzone;

R. A odnowisz oblicze ziemi.

#### Modłmy się

Boże! któryś serca wiernych przez oświecenie Ducha św. nauczyć raczył, daj nam w tymże Duchu prawdę miłować, i z jego pociechy zawsze się weselić. Przez Pana naszego Jezusa Chrystusa, który z Tobą żyje i króluje w jedności tegoż Ducha świętego, Bóg na wieki wieków. Amen.

Premisliae die 1. Julii 1869.

**Antonius Josephus**  
Episcopus.

**A. Consistorio Episcopali r. l.**

**Premisliae die 29. Maji 1869.**

**Ignatius Łobos**  
Cancellarius.



